




柳田文庫
文庫11
D 124
2



文庫11
D124
2

莊靖先生遺集卷之一

古賦

醉梨賦

六十五

花殘葉疎烏勸提壺春回雨淚之容香滿白雪之膚
得之霜而顏始紅見其日而頭欲扶夫天之酒星不
在於天化爲巢飲之徒煦甘姬旨嚙膏臍腴張公之
裔游無何之鄉哀家之胄入步兵之厨笑君子之交
淡閔大夫之色爾其未醉也磊磊落落高世之傑趨
之者眾甚於成心之李其既醉也昏昏漠漠保身之
哲趨之者寡比於不材之樗凌寒傲暑舞空蹈虛兀



010190553006

然將頽之叔夜塊然獨留之淳于其醉於心者心朋
心友也如郭奕之見阮咸其醉於面者面朋面友也
若程普之遇周瑜小二豪之在側悼一夫之泣隅當
是時也以日月爲過客以天地爲蘧廬猶笑夫獨醒
之子不肯醕糟之餽舖乃有心如渴鳥勿燥未濡夢
三江而吞五湖然後乃得蒙其齒錄策一醉之勳也
莫不愜魏梅之望快湯稜之蘇是所謂以醉醒醉者
邪梨之爲物也秋而後成屬西方之金其花皎而白
金之色也其實甘而冽金之味也皆得天地之義氣
介然特立確乎不移此性之常也然今之所謂醉者
乃其性之變者歟故今日之放乃向日之拘向日之
潔乃今日之汙隨俗俛仰與時卷舒彼常而不知變
者未免乎憔悴而守其株者也嗚呼噫嘻以舉世爲
桔槔邪則漢陰之甕不以用拙而不抱以舉世爲鴟
夷邪則井眉之瓶不以近危而不居蓋可及者智不
可及者愚然則是梨之醉也其中有趣雖父不能傳
之子宜其榼之不如

馴鹿賦

有足而跋有角而枝處山而適食野而肥一旦爲雉
兔者所獲遂見繫於藩籬不纏而縛不械而羈覩常

如崖異履平如險巖野哉之性何異夫由也之見仲
尼鄭人之夢鄭人之疑秦人之指秦人之欺母而歸
未能如西巴之麋與犬而嬉慎勿效臨江之麋鹿兮
鹿兮汝生我依我恩汝知不見夫人之子食其肉而
寢其皮

四言古詩

蕭權府三害圖

長橋之蛟南山之虎在彼州曲父老所苦豈獨若此
亦有周處周乃慨然恥聞斯語薄險投深踴躍健武
爾蛟既除爾虎既去周乃自勵履規蹈矩卒以將種
效忠典午按劍平西貞節克舉瑕以瑜掩過以功補
身雖云亾名播千古

止姚亞之刲羊

養生之鞭隴種之苗欲魯去朔在齊聞韶咄嗟老饕
腹如瓠枵踏破菜園合喫藤條

焦天祿野叟聽音圖

梨園弟子天寶之後誰其知音百歲遺叟曲終悵然
淚迸林藪時清眼明萬事緘口

唐叔王韋生臥虎圖

梁鴛之養或失其時曹公之肉不救其飢羊質而皮

三百六十一
蘇東坡集卷一
三
狐假而威誰能於此辯是與非

學中史正之會客

有懷伊人在洋飲酒我客戾止其嘗旨否未見君子
我心孔疚惠然肯來小大稽首

煙江絕島圖

江風不波峭壁森立冥冥飛鴻翔而後集

雙松古渡圖

傾蓋相逢堂堂兩公寂寥渡口以濟不通

古柏寒泉圖

冬夏長青晝夜不捨拔本塞源豈知量者

紙扇

竹疎而骨楮剝而膚權以行巽風乎坐隅

櫻扇

直節貫中怒髮衝上朝蠅暮蚊畏風長往

五言古詩

成之夜談省庭新事

偉哉青雲器底蘊莫能見開口論利害坐客服雄辯
汪汪江海量氣不許黃憲從來布衣願一擲輕百萬
投瓜必報瓊豈望在焚券雖承雨露恩慷慨輒自獻
與其便於己孰若於國便蓋嘗推此心天下欲兼善

儒家惟有孟日夜講不倦儻以利爲利請看貨殖傳

復和

驅馳戎馬閒太平不復見往往談雋永寧許齊士耕
有田宜早歸奪恐遭竇憲再三欲買鄰愧我無千萬
難倩沽酒奴待立便了券籌堂天下士風度邁羲獻
別後曳裾人造門恨無便握手再相逢虛左待益善
平生身口累老大折腰倦莫訝陶先生自作五柳傳

鎮山堂

崢嶸屋下城突兀城上屋初看頗驚眼再見堪捧腹
能無鬼神笑可柰瘡痍俗不哀梁間叟欲竭南山木

嵇康淬劍石

尋常論養生未得養生說擬從林下游一書交盡絕
旣無當世志安用三尺鐵頻頻石上磨神光浸秋月
可憐麓疎甚自謀何太拙危絃發哀彈幽憤終莫洩
死留身後名有愧侍中血

樊噲戲石

丈夫氣慷慨隱迹在東市或逢逐鹿人乃棄屠狗事
壯哉鼓刀勇旁若舞劍地遂摧拔山力自嘆時不利
至今空山石傳是將軍戲能興卯金運頗與黃石類
不期兩都後復有三國志過客對春風徒灑山陽淚

寄籌堂

老爲人所憐貧恨友獨寡等閑門外車盡入宰肉社
欲隨射虎將爭柰無匹馬安得化爲雲四方逐東野
大庇天下士擬作萬閒廈顧我蓋頭茅寧肯助一把
非無問舍心或恐臥牀下縱有願留人有館不能假
還因索居久往往罪商也須待舍館定然後見長者

毛晉卿肖山堂

悠然林下客世事頗能料閑中意自適身外名肯釣
卜居山之陽初爲識者笑勢將陵岱華氣欲吞嵩少
方尋愿谷歸稍近孫臺嘯微茫數煙岫巉絕對雲嶠
爲我增雙明未必在遠眺始雖如直友久乃得心照
恐隨有力去或被移文誚已見成膏肓百計莫可療
一時煙霞語慎勿駭廊廟咄哉肖山堂所以警不肖
又結同廟學落成

斯文天未器吾道有時厄方嗟鳳兮衰遽歎麟也獲
繼遭秦焚書又被魯壞宅邇來天下事多自馬上得
不修下車禮不獻在泮馘不授羽林經不講博士席
旁若沒字碑肯見一逢掖偶因長樂老盡挾兔園冊
及見中選人始知爲學益學者如牛毛自古數獲澤
連年取青紫易於地芥拾爭將逸駕攀遂向塞路闢

揮之無倚門從者皆入室肅肅俎豆風洋洋絃歌邑
幾時復論秀四海望偃伯術能嚮者誰世無秋風客

德老栽花成竹 芍藥花

物性隨所移歲晚氣自變失卻本來身還於身外見
尋參玉版禪如對菩薩面叢林一花祖派入香巖傳

劉漢臣堂甫北歸

哀哉同隊魚盡在枯池裏縱免鼎中烹將見渴欲死
造物何不仁豈獨困二子我雖江湖心恨無斗升水

母應之餉黍

憶昔周室衰周人詠黍離君今餉我黍為賦黍離詩

厥初藝黍時飯牛使牛肥八月黍未穫胡兒驅牛歸

胡兒不滿欲我民還買犢今秋犢未大又被胡兒逐

胡兒皆飽肉我民食不足食不足尙可鬻子輸官粟

只恐游碧落

壬寅重午日陪郡侯段正卿暨王用亨

劉漢臣濟之君祥仲寬姚子昂張唐臣

祿卿平陽趙君玉王潤之同行

浮雲翳炎景長夏愜幽事相陪林下友共造金碧地

清流漱寒玉老樹聳蒼翠何人開山祖妙處發天祕

悠悠歲月深剝落磨崖字遨頭興不淺有酒留客醉

幽鳥背人飛不慣聞鼓吹抵暮出山門溪風送歸騎

史遂良索詩

立身有道邦誰似直哉史流傳百世後各各異行止
許史有何厚在漢勢如彼安史有何薄在唐亂如此
人之賢與愚皆為類所使近從儕輩中偶得一狂士
未能通一經謂可拾青紫時時出俚句技癢不自己
只恐落調歌難入知音耳縱橫言世事不顧刺舌恥
焉知阮嗣宗口不挂臧否年高鬢如雪鄉曲所不齒
試與阿戎談咄哉犁之子 男牛兒

留別李巽之

癸卯三月十七日癸巳

嗟嗟平生交所恨不耐久幾年戎馬間太半正丘首
憶初識君面同門皆小友倏忽五十春相見成老叟
淹淹泉下人樹拱骨已朽崎嶇見在身何幸得此壽
感慨歲云晚哀淚迸林藪古今均一夢萬事付杯酒

七言古詩

司諫許道真徵復圖

君不見退休綠野平淮相靈臺不許丹青狀又不見
五湖歸去鷗夷槩越人爭鑄黃金像功成身退天之
道道直天憐去官早鹽梅須借築巖人羽翼重來採
芝老袖中諫草力回天害除利興車載懸何憂不識

荆州面圖畫如今處處傳

郭顯道美人圖

君不見昭陽殿裏蓬萊人終惹漁陽胡馬塵又不見
吳宮夜夜烏棲曲竟使姑蘇走麋鹿移人大抵物之
尤器亂未免天公愁雖然丹青不解語冷眼指作鄉
溫柔試問人間何處有畫師恐是傾國手卻憐當日
毛延壽故寫巫山女龕醜

杜詩誰道巫山女龕醜何得此有昭君村

宣差射虎

十二月初九日

北原風勁霜草枯草閒出沒藏於菟耽耽來此被誰
驅不防邂逅馮婦車將軍膽氣勇有餘手中笑撚金
僕姑等閑如射兔與狐兩眼錯莫精光無深山大澤
失所居或撩汝頭編汝鬚可憐肉食無遠圖伎倆不
及黔之驢

羣鼠爲耗而猫不捕

欺人鼠輩爭出頭夜行如市晝不休渴時欲竭滿河
飲飢後共覓太倉偷有時憑社竊所貴亦爲忌器不
忍投某氏終貽子神禍祐甫恨不猫職修受畜於人
要除害祭有八蜡禮頗優近憐銜蟬在我側何故肉
食無遠謀耽耽雄相猛於虎不肯捕捉分人憂縱令

同乳不同氣一旦反目恩為讐君不見唐家拔宅鷄
犬上昇去彼鼠獨墮天不收

注仙傳唐公昉師李八百得其神丹遂舉家昇天
鷄犬皆去唯鼠空中自墮腸出一月三易其腸
今山下有拖腸鼠束廣微所謂唐鼠

埽晴婦

世俗為埽晴婦者蓋假燮理之手導陰
陽之和使民間免乾溢之患也感其事
而賦之

卷袖褰裳手持帚挂向陰空便搖手前推後卻不辭
勞欲動不動誰掣肘偶人相對木與土神女但誇朝
復暮龍公不作本分事中間多少閑雲雨見說周人
憂旱母寧知東海無冤婦慇懃更倩封家姨一時斷
送龍回首

雨雹

庚子年四月二十八日壬戌大雨雹五
月七日八日又雹按左傳昭公四年魯
大夫申豐曰聖人在上無雹雖有不為
災以古者藏冰為禦雹之道祭寒而藏
之獻羔而啟之今棄而不用雹之為災

誰能禦之由是言之禦災其在人乎感而賦詩傷今之不如古也

按月令仲夏行冬令則雹凍傷穀注子之氣乘之也陽為雨陰起脅之凝為雹

雲龍失守元氣乖隱隱愁聽狂車雷須臾飄驟不成雨一天風雹從何來交橫散落星石隕紛霍迸擊冰山摧坳平忽訝坑谷滿埳起俄作丘陵堆驚心飛走殘妖天斲器枝葉枯根荻穿窗入戶彈相射填街溢巷把莫推恢恢難補天網漏凜凜欲壓坤軸頽一方生理遭殄瘁造物不恤空自哀是時仲夏行冬令誰

把四序顛倒催雖有舜絃愠不解孰謂鄒律春能回陽雖位降乾道在一陰纔進力可排履霜之漸此其始司寒挾黨結禍胎春秋大小百餘國獨向魯地三為災左傳僖公二十九年昭三年昭四年大雨雹世間萬事豈不見那用區區書觀臺我思天變豈徒爾以象告人當自裁注五行 占雹有眼天罰戒民過也

鼎齋

司馬景仁因病瘡而得腹疾鼎齋療之而愈因索詩為賦

茂陵千載文園客流傳耳孫猶病渴引飲自嫌江海

窄家無翹翦柰腹疾水帝之魂成水厄女丁婦壬不相得始圖一漑滋湯旱卒見九河歸禹畫嘗聞秋夫曾療鬼大勝扁鵲能起號君不見上醫可醫國異哉鼎齋堪鼎食

姚子昂畫馬

雄姿卓立開天骨騰踏萬里如神速可憐不遇九方臯空使時人指為鹿自從大奴守天育無由更騁追風足中原一戰收乾坤白髮將軍髀生肉

苴履

待詔門前東郭趾藍關路上仙人迹雪花紛披蓋地白東家不借借不得雖然近市屨亦無以故為新卽有餘同行留我木上座鋪過仰渠金十奴一生能著屐幾兩用心猶在阮孚上不須更覓下邳侯山林此計成長往時守下邳

兒輩刻木作匙

一震之威乃如此坐閒或失將軍匕不能便染公子指有意欲割豈奴耳小兒造物窮物理斗柄之揭如其尾雖然劍頭有炊米有愁遇著捩手鬼

聞蔡州破

甲午年正月十日己酉

不周力摧天柱折陰山怨徹青冢骨方將一擲賭乾

坤誰謂四面無日月石馬汗滴昭陵血銅人淚泣秋風客君不見周家美化八百年遺恨黍離詩一篇

籌堂尋梅

蕭疎籬落誰家圃尋芳信逐游蜂去眼前荆棘少人行馬蹏直到香來處怕愁貪睡獨開遲瘦損春寒鶴膝枝可是東君苦留客斜風細雨不堪詩

和秦彦容韻五

彦容寄詩有先生高見真吾師速營菴

裘猶恨遲窗明炕暖十笏地松風蕭蕭

和陶詩山野已尋雲外路直入天壇最

深處踏開李愿舊游蹤請君自草盤谷

序之句故依韻和

養賢列鼎手自烹爨調元化和如羹馬蹏一蹙燕地裂氊裘尚拂陰山雪將軍表請願出師壯士揮戈惟恐遲武成纔試二三策黍離已見閔周詩縱橫門外豺狼路我老此身無著處君不見平淮十萬兵猶向襄陽守朱序

見征淮漢

君不見子幼自勞羔日烹何如命駕季鷹吳中煮蓴羹又不見姜侯設鱸鑿冰裂何如徒步拾遺長鑱黃獨雪幸遇南來董鍊師說似壺天日月遲謫仙之游

乃非謫長安市上斗酒百篇詩蒲輪休指商山路得
到白雲採芝處諸生待揖隆準翁馬上未遑事庠序

又

獵犬已爲兔死烹猶向漢俎分杯羹脚靴手板東欲
裂尙立唐堦沒膝雪三寸舌爲帝者師終比赤松見
事遲相看一笑在目擊何用左思招隱詩出門便是
天壇路雲開指點巢仙處不辭杖屨從子游王者之
後養老在西序

時寄王子榮西齋

穀因辟後厭鼎烹那在巨嫂轅釜羹冠未挂前已先
裂一簪卻上山頭雪我雖無師心我師速修何恨下
手遲論中自得養生理筆底盡是游仙詩休向回車
問前路終須有箇安排處晴窗點檢白雲篇不知誰
爲作者序

不嫌瓠葉日猶烹不羨公子染指爭鼃羹不把荷衣
等閑裂不羨曹人共服麻如雪愛身肯似賤場師凡
骨只愁輕舉遲北山未出移休勒東老雖貧樂有詩
望中雲海蓬萊路誰道樂天無歸處一千年鶴再來
時行鴈難將弟兄序

暴雨

秋夜暴雨上漏下溼終夕不寐因得鄙

句奉呈

疾雷破山雲暗天雨腳不斷如麻懸淋浪一室無乾
處何異露坐乘漏船鼠牙便是潰隄蟻牆有百道飛
來泉狂客豈因狂藥使眼花如落井底眠採石江頭
弄明月一夕去作騎鯨仙我雖忘我亦可憐但恐不
免蛟龍涎苦無根源笑潢潦可能朝宗東注覺海道
君不見耒陽禹力所不到至今難尋杜陵老

綵樓

高平縣綵樓聞之舊矣今始親見議者

猶謂高下侈麗不及向者三分之一因

感而賦之

層層華構高且崇萬綵糾結填青紅何人下手奪天
巧都入意匠經營中書契以來未省見異事驚倒百
歲翁郢斤般斧莫敢近卻立屏息慙無功寒窗憂憂
鳴機婦積年杼柚一日空山川謂可錦繡裹塵土盡
皆羅綺封前者攀轅後者挽奔車徑欲趨靈宮三年
送迎禮雖舊人事不與天時同方當炎屬行夏令權
勢大抵歸祝融神之與人無厚薄蓋以至誠能感通
豚蹄豆酒道傍祝所獲神賜亦已豐閭閻疾苦還知
否我爲大夫歌大東

享炎帝閏年

上九里谷與濟之君祥仲寬李德方朱壽之

姚子昂

太行巍巍形勢尊造物設險雄中原巨靈一朝劈石
裂連峯忽斷開山門侵雲直上幾千尺挂壁一徑愁
攀援十步回頭五步坐慄慄汗出如漿翻清風掖至
最高頂下視寰海塵埃昏天壇咫尺若有待顧我不
往慙食言世間好處豈不愛腳力雖盡心常存為君
試寫遠游興夜半月出清吟魂與所定之約游天壇不果

剝蓮蓬

相將去採秋江蓮青房戢戢實且圓倒靴收菡亦可
喜春筍未剝空流涎玉井有花開十丈至今依舊藕
如船試索綠莖不尋藕與誰共此從巢仙

遼漆水郡王降虎

陳仲和之遠祖

秋風漸高秋草衰空山校獵千騎圍突然有物勢
猛萬里侯相食肉肥橫行妥尾不畏逐挾似有百
步威當時扈從懦於鼠雖欲下車人其非將軍一奮
躍身出氣雄志勇捷若飛攘臂搏虎虎負去須臾
皮擒虎歸北方銳兒皆好武無愧疋馬及短衣聲名
赫赫耀前古卻笑馮婦膽力微昨田命氏報恩異至
今漆水生光輝君不見射石李廣一箭亦可喜死不

三百二十八
東坡集卷一
封侯知者希

遺善堂

雪巖老人欲其子孫之善何如是諄諄也哉有子仲賢以其遺命書之於堂訂曰遺善遵而行之朝夕於是其命之使行者不敢不行其所行者皆善事也命之使不行者不敢行其所不行者皆不善事也非惟不失士君子之行其孝子之心何時而已耶噫處世兵革之間不念於善亦所未聞故喜而爲之詩

君不見遺子韋侯只一經相門出相那在金滿籬又
不見燕山教子以義方靈椿老去五枝丹桂芳破散
錢堆一百屋紫微不願有子如窟郎陷爲天下輕薄
子伏波不願有子學季良身前身後事茫茫我恤我
躬猶未遑長把賢愚挂懷抱請看積善之家遺善堂

贈出家張翔卿

翔卿河內人也籌堂毀其簪冠使復儒
業昔唐李素拜河南少尹呂氏子晁棄
其妻著道士衣冠謝母曰當學仙王屋
山去數月復出聞詣公公立之府門外

使吏卒脫道士冠給冠帶送付其母事

類翔卿故書

大袖斜襟龔布袍髻丫撐似彌明高滑稽自謂世可
 玩清淨不守形徒勞百年光景已強半容易便把青
 春拋欲向蓬壺尋福地柰何龍伯釣後負山無海鰲
 欲駕天風朝帝闕柰何巫陽去後九虎守關牢養生
 未獲一漑力那忍遽絕平生交但令造物哀正直豈
 肯屈曲從仙巢留侯學道欲輕舉尙且強食扶金刀
 安期當年本策士意氣直謁扛鼎豪平地作仙亦不
 惡或恐上界官府名難逃

注後山詩話昔之黠者滑稽以玩世蒯通初善齊

人安期生安期生嘗干項羽羽不能用其策而

項羽欲封此兩人兩人卒不肯受

君不見醉吟居士不歸海上山又不見昌黎先生屈
 曲自世間况非出塵風骨羽化難夜叉白日守天關
 黃庭正恐坐誤讀鐵鎖縱垂那可攀我笑學仙王屋
 著道冠只待河南李侯脫去然後還

籌堂燕

籌堂梁上巢燕將雛幾墮鼠計飛鳴哀
 訴者久之主人得其情而護焉卒無所

害夫舐犢之愛物物皆爾感而為之賦
且以戲克紹

陰陰池館落花泥出入通家獨見知曾遭江上洶河
嚇又被巢邊野雀欺且欺且嚇亦不惡柰有鼠輩窺
其兒兒方在卵卵何危哀鳴若訴奚勝悲主人能得
腹中事百計護持彼毒無所施羽毛養就刀剪齊雄
雌相隨引雛飛尋常百姓家汝巢非汝宜春兮來秋
兮歸莫忘烏衣巷裏時

趙倅司馬山謝雨

乙未歲旱自春徂夏五月丙申澤倅趙

公唐齋沐潔誠就司馬山祈禱八日庚

子大雨年穀遂登民物安逸累獲嘉應

次年丁酉孟夏己丑公與本郡僚屬父

老人等具牲幣酒醪簫鼓之禮仰荅神

休仍求嗣歲祭畢聊識歲月云耳

去歲不雨民憂深愆陽亢甚多伏陰冥冥造物豈難
料感以至誠神所歆我公默禱若響應出岫誰謂雲
無心天瓢疑是池中水三日以往皆為霖淋漓元氣
滿人望解愠何止薰風琴家家豚酒樂豐歲空山鼎
沸簫鼓音春祈秋報有常典仰荷靈貺如桑林

四舍人生日

驥之子鳳之雛精彩丰容美且都年至十二三頭角
 已異同隊魚積善之家慶有餘掌中幸得雙明珠定
 知他日必充間不妨更讀古人書絳帳先生當今之
 範模步亦步趨亦趨執經北面預先講唐虞明主何
 嘗不用儒相門出相文可無豈獨手撚金僕姑能騎
 生馬駒然後稱為大丈夫

贈儒醫卜養正

孰親如身在所慎一病能惱安樂性囊中探丸起九
 死以其病病人不病豈獨和扁號神聖能於鬼手奪
 人命嘗聞上醫可醫國何不使權造物柄

游濟源

庚子春季與劉濟之君祥仲寬仲美姚
 子昂秦懿夫馬子温李德方深之伯英
 朱壽之下太行抵覃懷望方口臨沁水
 二十三日丁亥郡侯段正卿因西山鎮
 遇回自析城來赴期值雨留宿奉仙觀
 翌日己丑天霽具牲酒幣帛謁清源王
 廟禮畢會友人郭伯玉李慶之王天益
 史德秀王輔卿紇石烈仲傑完顏壽之

方外士祁定之郭道正元明道部將段
 玉等大飲於裴公亭用麾下鼓吹以樂
 賓薄暮極歡而罷故賦之紀一時之勝
 游也

元戎小隊閑登臨悠悠旌旆穿山林太行南下路險
 澁不憚著腳窮幽尋清源祭秩世所重喬木掩映靈
 宮深是時方口雨初過天風破曉開微陰入門為問
 廟見禮白髮黃冠通古今且言享誠非享物那在與
 俗占浮沉鞠躬執簡默有禱脯酒縱薄神所歆幾年
 願違莫能遂至此始得償初心點檢圖經歎禹迹山
 青水綠無知音竹根醉倒客星散夜聽波底蛟龍吟

樊氏昆仲懶窠

君不見讀書邊孝先謂師可嘲何典記又不見梁州
 陰子春足不肯洗恐敗事何須向人說道理養得疎
 慵性如此擺手便行誰家子嵩洛之間兩居士未嘗
 點檢形骸外挂角羚羊心已死問之非漁亦非樵人
 言似癡還似高叔夜自知不堪七以書遂絕平生交
 一官從此束高閣賴是天教閑處著時人爭賦懶窠
 詩我羨懶窠詩不作

壬申歲旱官為設食以濟飢民

千里地赤澤未霑驕陽爲沴烈火炎就中秦頭晉尾
旱魃所棲託十室九室突不黔撐腸一飽豈易得咀
嚼草木如薺甜山川課雲職不舉無乃風伯號令嚴
民是天民天自恤何時霹靂起龍潛

男揚洗兒 十九歲

自慙無德爲兒父今朝把酒爲兒壽爲兒今賦洗兒
詩願兒他日於兒厚我猶不恤况我後委蛻自天汝
非有速宜修德大吾門無復心童年十九

兒歸來 禽名

兒歸來兒歸來百年郎罷恨何日盍馨同東去但除
嚴母墓望思空築茂陵臺兒歸來兒歸來一聲未盡

一聲哀

贈郭顯道醫

惡石聚散元氣樸本草搜剔造化窟俱收並蓄籠中
物山精水怪藏不得休言魄爲天所奪入其手者命
可活須防姮娥去奔月大勝扁鵲能起號君不見錢
子飛藥不敢施爲鬼脅

和荅董用之

將軍死戰血染衣空山白骨鬼夜嘯洗兵政要及時
雨天禍未悔無雲霓卧龍不起主張漢獵犬待烹僥

倅齊就中儒冠身多誤如坐矮屋頭常低敢將龍鍾
哀造物但幸老大能扶犁咄哉董生三寸舌善謔不
思爲虐兮人間回首憂患始去之不速將噬臍

再和秦彥容韻

屢屢歌後伏雌烹箸猶未下愁覆羹布衾多年踏裏
裂夜半寒窗灑風雪待與重尋痛飲師東山杲杲日
出遲撐腸挂腹文字五千卷一字不入高人詩幾年
不踏紅塵路直入白雲最深處君不見洛陽城下來
歸魂一夢思鄉歎溫序

按後漢溫序次房行部至襄武爲隗囂將荀宇所

執欲降之序不聽伏劍而死光武命送器到洛

陽爲冢地長子壽爲鄒平侯相夢序告之曰久

客思鄉里壽卽棄官上書乞骸骨歸葬帝許之

乃反舊塋焉

莊靖先生遺集卷之一終

莊靖先生遺集卷之二

五言律詩

答祁定之韻

黃菊催秋暮青山勸客歸
事隨時漸改人與物皆非
爽氣收殘暑閑雲送落暉
平生會心侶別後往來稀

游太平泉

稍有林泉興相陪杖履游
百年人易老千種事堪愁
是處花無主誰家酒可篋
芳時好行樂春去不能留

宿夾谷彥實庵

挂名仙籍上晦跡茂林間
門外丹河水牆頭明月山

境隨心自遠人與話俱閑應笑紅塵客區區謾往還

河橋成

橋成有日必有佳句寫河上逍遙之興

贈子榮及督役楊成之

預積他山木重新兩岸隄龍依天上卧虹傍水心低
不假鞭秦石何勞立蜀犀落成應有日誰向柱先題

又

河廣思同濟天寒怕涉冬冰雖將自合船尚不宜從
柱引來歸鶴淵藏未躍龍一編圮上叟千載願相逢

又

勢截長河浪橫陳百步梁經營方斷手過涉不褰裳
漫惜千金瓠休誇一葦航西風簫鼓咽奠酒水仙堂

癸巳冬至

共愁天紀亂依舊日南時氣本自然應策今誰可推
每懷添線女還意覆杯兒偃蹇無歸計天涯兩鬢絲

又

歲以四時成氣自一陽始雖然廢羲職那可亂軒紀
人生幾寒暑天道頻甲子徒嗟潦倒身汲汲百年裏

乙未冬至

已應黃宮律初生復卦陽道隨天在北愁與日俱長

節物驚時換年光有底忙浮雲多變態試與問何祥

任仲山弄璋

奕世多陰德傳家得寧馨人間熊有夢天上昴無星
喜洽犀錢座先生玉樹庭鍾情笑盧老白髮望添丁

五哥生日

落落青雲器天然骨骼奇自從懷橘後每恨學書遲
同樂憐荆樹相煎笑豆其氣豪常自許躍馬是男兒

代四哥贈

相戒南陔養長看花萼輝義深姜季被恩重老萊衣
隊似魚同戲行如鴈共飛讀書當自勉繼取錦堂歸

元夜有感

春城行欲遍百感到愁邊市冷猶燈火人稀尙管絃
梅從今夜落柑憶舊時傳歸去西窗月無情照不眠

四哥生日

秀出三株樹芳聯五桂枝杜家憐驥子徐氏重麟兒
已有高門望方當志學時一杯添壽酒滿酌不須辭

寒食

爲戀風光好那堪節物催事隨浮世往花似去年開
莫灑無家淚須傾有限杯詩人多少興都向醉中來

九日下山

宰肉陳平社折腰元亮鄉車無門外轍菊與徑皆荒
所恨國難守若爲家不忘天威寒氣逼急急下山陽

王生壽日

幾度縣弧節當年琢玉郎徐行知禮讓幼學愛文章
莫厭魚同隊休隨燕入堂眉間色多喜禁巒近東牀

游青蓮

閑攜方外友同謁梵王宮山吐三更月松搖萬壑風
流年飛鳥過浮世落花空不有歸來興何能見遠公

又

行處春風惡山中勝槩藏漸佳如蔗尾薄險似羊腸
翠揖雙峯角清臨一水堂夜長僧睡少爲我話興亡

過雲中

把酒不成醉出門行路難客愁千里破歸夢五更殘
三仕有何喜一生常鮮歡恨無南去鴈爲我報平安

宿海會寺

同孫講師明上人趙叔寶劉巨濟夜酌
佛堂光未放桑下喚難回是處皆堪歇何山不可開
泉因龍吐出經自兔銜來徑向黃沙過尋僧問劫灰

又

青山雲水窟杖錫幾時來竹待香巖擊松經道者栽

西江無水吸震旦忽花開三笑圖中友同傾破戒杯

游碧落

己亥仲夏十有九日平水曹漢卿楊子

平本郡李鑑臣劉濟之君祥姚子昂史

遂良同謁治平院與上人和霽月煮茗

道話抵暮而歸

寂歷松間寺臨流勝槩藏斷雲開石壁橫吹爽溪堂
謾與詩情在留連道話長行人貪弔古歸路半斜陽

九里谷

九曲羊腸路千層劍戟山行鉤藤蔓刺坐印石花斑
樹發三春暮雲歸萬壑閑相陪林下屐雖倦不知還

食芡

池底休鋪錦鷄頭自有栽柔中皆水性剛外乃天才
精彩惟魚目珠圓出蚌胎坐間咄嗟致不似荔枝來

穎陽元道人虛白庵

有山心可算有水耳堪洗飄飄元逸人寓意在山水
勘破人閒世不聽心與耳一室虛生白自得吉祥止

八日登山同謁吳王祠

四月

老樹凋殘盡靈祠寂歷中古今時易改幽顯意能通
歲序屢登樂俗追三讓風送迎人散後日落亂山空

陽城懷舊

呈陽敬之燕子和李文卿

路梗傷時事春歸感物華風波千萬丈煙火兩三家
樹杪失巢燕牆根無主花當年人不見何處是生涯

又

道途行處惡故舊別來稀澗口分流水林梢挂落暉
好山留客住幽鳥背人飛門外秋光老征鞍尚不歸
上長平寄楊成之

衰遲長在外矍鑠愧征鞍世路驚心惡天風刮面寒
迢迢人漸遠冉冉歲將殘今夜梅稍月同誰共倚欄

獨坐

地偏無俗客日在掩柴扉暑退閑蒲扇涼生換葛衣
風高雲散影露下月揚輝獨據胡牀坐心清即道機

乙亥過河

一身長道路四海尚風塵昔作依劉客今為去魯人
渡河年在亥乞酒歲非申別後山中友相逢話又新

河陽呈苗簡叔

妖氛長斗北殺氣尚河東人物不如古地圖祇自雄
三城環野水二麥卧天風多少逃亾屋荒涼晚照中

即事

炎涼愁裏過陵谷暗中遷素拙生生計尋耕下下田

爲嫌頻告糴卻恨不逢年門外催租吏長妨對聖賢

中秋對月

雲山懷素隱秋興暫來歸月與人同醉星隨客漸稀
入河蟾不沒遶樹鵲何依浩氣凝光界瑤臺夢欲飛

山中寄張漢臣李廣之

枳棘非所棲繫匏焉不食未黔墨子突又奪伯氏邑
一年三褫服半歲兩塗敕歸去來山中無器亦無得

經童

盈門修鄭校同隊執韋經蘇子應千里徐兒向九齡
鴈行成次序鶯語太丁寧堪笑西城老朝朝酷教刑

自遣

居閑聊自適造物果何如生理年年拙交情日日疎
吠猶聞跬犬技可笑黔驢誰識徘徊意西山有舊廬

過星輶

古道開天險危峯拔地形連營南北戍過客短長亭
野燒驚山鬼胡雲掩將星何人弄羌管哀怨不堪聽

七言律詩

小旱雲而不雨

阿香誰使送雷聲敢望天瓢一滴分恨魃長爲周地
虐閔厄幾被魯人焚風吹海立垂垂雨澤與山通處

處雲何事卧龍猶不起得微往見葛陂君

注山谷得微往從董父餐寧當罪繫葛陂淵

復用韻

區區布穀不停聲安得銀河水半分湯稼未應枯後
漑周川豈獨旱如焚是誰主當知時雨有底商量出
岫雲造物不為天下計只將花事了東君

十六日雨

平地俄驚霹靂聲老龍功過此應分不知東海因誰
祭卻笑西華欲自焚四面蔽虧無日月百神奔走會
風雲時人那識天公事一概惟知有巨君

注鄭弘字巨君行春天旱隨車致雨

注後戴卦為西華令縣旱積薪以自焚火起而大

雨

王子榮過家上冢

暫令元戎小隊行盡驅春色入山城蔥蔥佳氣隨軒
蓋嫋嫋高風卷旆旌題柱橋邊男子志散金閭里故
人情貴游前後知多少不使堂虛畫錦名

州有畫錦堂

用趙之美留別韻五

把酒離筵且莫辭坐中瓜葛暫相依花從識後常含
笑鳥自還時想倦飛往事微茫春夢斷故人牢落曉

星稀天涯白髮禁愁得好在西山不早歸
長短亭中送別時問君東去復何依今宵明月三人
共來日紅塵一騎飛傾蓋莫嫌相見晚斷絃惟恨賞
音稀天涯盡道還家好笑我雖歸似不歸

爲君不惜送行詩但恨蒹葭失所依流水盡朝東海
去孤雲只向太行飛仕途冰炭收心早客路參商見
面稀一曲陽關歌未徹聲聲頭上聽催歸

遙指東山去恨遲爭如蓮幕早來依須知宋鷓猶能
退有底齊禽尚不飛洛下書生憐我少燕南壯士似
君稀主人好客慊慊醉正要髡留肯放歸

平生藏器待何時除卻荊州不可依預報行人應鵲
噪相將送客有花飛鴈從去後弟兄少鷺未來時朋
友稀不盡赤心今日話東山無以我公歸

赴山陽

寄君祥濟之仲寬子昂

立馬西風不忍行往回只是片時程一年又作半年
客百里有如千里情落日寒林上下路淡煙疎竹水
邊城願君把酒休惆悵四海由來皆弟兄

白文舉王百一索句送行

世事紛紛亂似麻不堪愁裏度年華傷心城郭來家
鶴過眼光陰赴壑蛇彈鋏歌中成老境班荆話後各

天涯何時造物歸真宰卻覩人間第一花

承二公寵和復用元韻

脫却朝衫著紵麻殘年猶復夢京華世情共指鹿爲
馬天意反教龍作蛇白髮不公人易老青山有素恨
無涯那禁送別東郊外滿目離離濺淚花
有客衡從說蓺麻要教身後見西華若爲養得能言
鴨未解除他引睡蛇歸去稍知閑氣味荒唐猶種老
生涯眼前浮世憑誰問獨倚東風看落花

重午偶題

龍鍾歎我百年身幾見山城節物新水荇長如牽翠
帶石榴半似蹙紅巾可憐今日依劉客便是當時弔
屈人誰道南來風解愠試從比屋問吾民

春日

白頭不柰隙駒催慣飲屠酥醉後杯百歲無多偏書
短一年將盡又春來東君得地權終在北斗隨天柄
已回造物卻還真宰手衆人今後試登臺

和參謀李舜舉

平步青雲感遇初試看傾蓋氣何如橘皮應笑陳人
勝雋永爭談辯士書夢鹿果能誰得鹿知魚未必子
非魚青山馬上多詩句北斗以南名不虛

三百四十六
一怒王師弔伐初堂堂人物古誰如
劍頭何患無炊米楯鼻多應有檄書
盡道公孫能躍馬應憐學士獨焚魚
旌旗未度長河水千騎元戎已擣虛

和東庵孔安道韻二

擬結閑中一草堂此心安處卽吾鄉
須知見在身爲患見說長生藥有方
老去看書徒引睡愁來得句不成章
從前習氣都除盡待與高人論坐忘
淡泊生涯共一堂杖藜踏遍水雲鄉
不妨廬結在人境應念客來從遠方
三笑可無陶靖節八仙宜得賀知章
袖中時出煙霞語習氣師兄亦未忘

和子榮

暫使彭宣到後堂安昌只以醉爲鄉
浮雲世事日千變流水生涯天一方
老子興雖如庾亮故人恩不減蘇章
能消幾兩尋山屐回首狐丘本未忘

五舍人生朝

積德高門慶有餘隔年記得掌中珠
清新月窟兩枝桂俊逸渥洼千里駒
戲自老成看蠟鳳志從小異見樗蒲
一朝騰踏青雲上快覩徐卿第二雛

壽堂壽日

此生但覺醉鄉寬

王績

誰謂螭猶北海蟠

王猛

處處

相迎皆倒屣 王粲 人人共喜欲彈冠 王陽 州應向日

懸刀夢 王濬 山試今朝拄笏看 王子猷 仙馭未來繼

氏鶴月明吹徹玉笙寒 王喬

烏衣歷歷是名家人物于今比晉多俗論不侵揮塵

話 王衍 壯懷都付缺壺歌 王大將軍 雖無金埒堪調

馬 王濟 賴有黃庭可換鷲 王羲之 見說長江欲飛渡

王濬 那須冰合望滹沱 王霸

和子搢中秋

最後賓來舉白浮要須同賞桂華秋蛾郎應恨燈無

嬋媛能教月再修分外高寒天上闕就中明徹水

邊樓姮娥不我為生客休把光芒取次收

和子搢九日謾興

此身到處賈胡留細雨斜風冷淡秋佳節又從愁裏

過故鄉不似舊時游試拈紅葉題詩句強摘黃花泛

酒甌落帽龍山幾人在雲沉鳥沒恨悠悠

節物催人分外愁干戈眼底未能休丹楓落處吳江

冷黃菊開時灞岸秋可是涼風添寂寞更堪缺月照

綢繆悠悠今古何須問淚灑牛山亦過憂

沁園懷古

風波平地難開眼劍戟羣山欲割腸冠蓋隨時成物

故園林何日破天荒摩挲碑石空懷古點檢圖經爲
補亾誰是熙熙堂上客近來老子也和光

欲復而未

和卽事

擬將唾手取封侯世事那禁種種愁未可搏他馮婦
虎終須享此景升牛但知勿剪甘棠在莫爲難圖蔓
草憂自古貴人天所予定教名字到金甌

和新秋

簾捲西山雨乍停自知時節候蟲聲新涼邂逅如佳
客殘暑留連似宿醒可見韓檠燈下志且憐班扇篋
中情若爲解得吾民愠更鼓南風一再行

寄史正之

往來門下亦風流分得等堂幾許憂剛甚養他橫槩
馬何如了取濟川舟人還忌器休投鼠誰爲蹊田欲
奪牛聞早抽身閑處著不妨仍帶醉鄉侯

聞捷音招王德華吳天章等出山

紅塵一騎報平安知是元戎小隊還且喜好音來沐
水仍將舊事問潼關橫雲自護車箱澗落日空銜箭
筈山只恐膏肓歸不得早隨春色到人間

用子榮河橋送別韻

河橋把酒不成歡正是離人去住閒公道幾時饒白

髮世情今日見青山娟娟明月無家對慘慘孤雲待
我還慙愧慙慙花裏鳥一聲聲送出陽關

承徐子賢賈仲常張伯英寵和復用韻

天涯杯酒強追歡白髮光陰轉首閒獨夜夢魂千里
月暮年心事數重山回腸都為愁將斷行腳猶疑債
未還儻得一廛休老地柴門今後定牢關

宿村舍二

別後曾無一日歡風光都在落花間眼青羞對門前
柳頭白相驚雪裏山華表鶴來猶是客烏衣燕去不
知還森森庭院荒荆棘虎豹窺人夜撼關

握手親情有底歡疎籬茅舍兩三間尚憐作者千年
調那肯分人一半山安得意如張翰適憑誰放取浩
然還得君斗酒須防客不怕重門更著關

注坡云重門著關不為君政恐惡客來仇餉

懷抱何曾得少歡春愁飛上兩眉間一瓢謾酌獨清

水幾屐能窮無盡山見說酒兵長日備

江諮議酒猶兵也可千日

不用不可一日不備酒可未知詩債幾時還須防別
後將軍禦不待尋盟輒斬關

三兩殘杯不盡歡強陪年少貴游閒客中未必常為
客山上那堪復有山鶴髮都從愁裏變貂裘直待醉

時還一朝卻入龐公市驚倒城門老抱關

注坡云城門抱關卒怪我此重游

閔董用之

怪底年來懶下帷似嫌榜尾姓名題一枝自謂烏難
借百里誰知鳳肯棲頗訝生前徒強項未應老後不
然臍試將點檢平時友太半佳城在馬蹏

用之次韻復答

小齋飄雨注風帷門外青山困品題足躡盡知齊是
假膽嘗爭柰越猶棲任教別後書盈篋贏得年來氣
暖臍聊與老農歌帝力一缸村酒薦豚蹄

夜雨

五月十八日夜雨濟之君祥正之顯之

漢卿子昂燈下酌酒相賀喜而為之書

元氣淋漓徹九垓那消掩耳一聲雷雨雖不解知時
節雲豈無心出岫來所恨龍潛猶未起大都天意卒
難回等閑莫話為霖事且對簷花盡此杯

夜半天公號令催即時驚起阿香雷須知稼穡艱難
甚誰把陰陽燮理來不使魃為周地虐定應龍自葛
陂回鄰家酒熟留連客聊與愁人共一杯
化工寧許著詩催平地俄驚失筍雷行雨夢從巫峽

斷為霖人自傳巖來老農學稼無多力太史書年有
幾回愛酒陶家纔種秫何如其此卽時杯

用之請還公府用韻拒之

寇將軍力自宣幕中議論可回天氣吞驕虜鞭先
著威定并門檄罷傳正恐一隅防飲酒

張漢臣馬武
有同醉堂

休從百尺笑求田楊雄祿位誰能動姑為侯巴草太
玄

弔劉伯祥

記曾林下見矐仙惆悵紅塵未斷緣不憚廣文寒處
坐屢逢元亮醉時眠難逃辰巳賢人歲有負蓬鹽太
學年落落天才無地用卻還英氣與山川

伊闕鵝鵝堂 二

同王德華子正善卿澤之焦彥昭唐俊
卿張伯宜史正之李文長姚子昂男李
楊杜浩然書壁

千年古道入荒城破屋頽垣一聚塵天地如何收險
阻山川猶覺露精神餘波禹貢朝宗水習俗周南既
醉人把酒西風無限興黃花時節對嘉賓

一日灘流淺自分灘頭鵝鵝似通神大都鸞棘無多
地畢竟烏臺得幾人浮世堂堂春易去隨時局局事

皆新當年靈翼今何在滿目西風動白蘋

亂後寄兄二

長劍何人倚太行
羶裘入市似驅羊
怒降白起不仁
趙死守裴侯無負
唐可柰崑炎焚玉
石更堪蜀險化
豺狼紫荆猶是堦
前樹風雨何時復
對牀
萬井中原半犬羊
縱橫大劔與長槍
晝烽夜火豈虛
日左觸右蠻皆戰
場丁鶴未歸遼已
冢杜鵑猶在蜀
堪王此生不識連
昌樂目送孤鴻空
斷腸

送趙慶之赴邠州

且莫怱怱數去程
一壺別酒爲君傾
三年簿領妨行
樂十里溪山管送
迎溢浦蘆花風裏
恨渭城柳色雨
中情三峯無復同
州看休著新詩笑
不平

別邵陽申伯福昆仲

百里相望邂逅遲
如今始得話心期
情深堂上留髡
夜興盡山陰防戴
時客舍故人那用
送異鄉游子不
勝悲煙村水驛秦
川路來往郵筒好
寄詩

賀子掇來韻

新年桃李似無情
回首繁華一夢驚
點檢青氈非故
物等閑傾蓋昧平
生雨中燕子還留
客風裏楊花欲
送行試聽東流橋
下水向人時作斷
腸聲

郭仲山壽日

乘興游山也自賢
千金奚羨築臺燕
誰為洛下同舟友
人道江頭弄月仙
欲向漳源歸舊隱
便從莞谷種閑田
橐駝樹得長生理
不解如君養性天

和河上修橋四

故里風光衣錦游
賦詩誰與共臨流
相逢依舊山青眼
也有何愁浪白頭
官渡方當橫槩日
合肥正是著鞭秋
坐閒有客誇雄辯
不念題橋志未酬

日日相陪杖屨游
往來林下亦風流
雲閒隱隱堆螺髻

雨後鱗鱗漲鵬頭
休恨臨津臨津河
經始晚且看

利涉河橋名落成秋尋常公事閑
中了詩債如何尙

不酬

眼底關山憶舊游
滔滔河漢自東流
星槎不覺來天上
鐵鎖那能護石頭
顧我已嫌題柱晚
喜君正是濟川秋
酒閒豪氣誰堪共
一醉千金價不酬

落魄天涯頗倦游
片帆歸去得安流
幾年無事誇犀首
一旦封侯看虎頭
飛將正當南渡日
拾遺還是北征秋
龍鍾不稱凌煙像
只有山林志可酬

壬寅九日同史正之劉濟之君祥仲寬姚子

昂東城小酌寄錦堂王君玉

長天一色鴈行斜雨過南山氣勢加懶後不冠羞白
髮興來無酒負黃花何人見憶閑陶令有客徒嘲老
孟嘉秋景滿前宜共賞未應件件屬詩家
興來落筆任橫斜坐上朋樽續續加貌似葉紅皆被
酒頭如雪白也簪花金風漸急秋將暮玉樹相依客
盡嘉醪酌入城扶不去臨街下馬是誰家

隨州長官張鵬舉暨婿陳振文見過

寂寥秋思梗吟懷幾度柴門鵲噪開一話勝看江表
傳百書不及隴頭梅馬催行色日邊去鴈送歸程天
際來萬里龍庭莫辭遠中原事業望人才

和子榮悼恒山韻

功名人比漢淮陰猛虎俄因犬輩擒星落旄頭兵似
火雲屯細柳士如林豈期虞虢乖唇齒謾倚良平作
腹心灑盡英雄憂國淚變風那得不傷今

消盡羣陽道長陰將軍何患敵難擒唐家外望歸藩
鎮漢室中興仰羽林忽墮曹吳分鼎計方知胡越濟
舟心依然錦繡山川在一旦浮雲變古今

剛忠公

未除妖氣斗牛閒一夜長星落將壇天意欲將全節
畀人心無奈此時寒斷頭那肯降朱泚血指誰思滅

賀蘭立盡太行山上石我公忠烈不容刊

同濟之遊百家巖懷郭延年有感 三月

雨晴閑向百巖游今古都成一段愁老衲解回山下

虎稱禪師真人跨入洞中牛陸真子水流花落三春

暮鳥沒雲沉萬事休有道碑前空墮淚往來誰復共
仙舟

辛丑中秋夜與用亨漢臣濟之君祥子昂仲

寬及諸同志聚飲於學宮陰不見月二

節物相催近覺頻勝游攜酒意何勤幾人白髮對明

月萬里青天愁片雲嫋嫋風高秋已半厭厭客醉夜

將分督郵氣味從來惡今日尊前也獻芹獻送良酒

莫嫌勝日燕游頻且慰寒窗力學勤白也停杯將問

月退之利劍欲開雲清光難比秋三夜痛飲何辭酒

百分况在頰宮思樂地與君共采水中芹

送別曹漢卿

馬上功名柰老何出門無地不風波愚誰試著回天

力有客空回卻日戈青眼乍驚行處少赤心常笑話

中多愁人近亦無腸斷又聽離筵送別歌

九日濟之君祥仲寬子昂攜酒於漢臣書齋

小酌已而乘興與眾老人會於城西馬

氏東籬談笑盡醉抵暮而歸爲賦此以

紀一時之勝事

相扶醉袖出西城翠展秋山一望晴坐上孟嘉嘲未
解籬邊陶令話多情酒猶強飲狂時藥菊莫尋餐落
後英興盡歸來天色暮老人星散月還生

暮春和端甫韻

暮春索詩且以不能陪郊外之游爲恨
雨夕風朝樂事妨老來猶自爲花忙春光一歲只三
月尊酒百年能幾場辛苦衙蜂輸蜜課等閑巢燕得
泥香如何復共遨頭醉待把銀瓶指點嘗

承和復用韻

草草杯盤興不妨一年一度送春忙我無酒量難投
社君有詩情合擅場衣錦堂前冠蓋貴落花徑裏綺
羅香暫時忘卻愁滋味驀上心來似膽嘗

答趙之美見和

不堪春事等閑妨汲汲光陰過隙忙青眼久懸高士
榻白頭羞入少年場風從定後花猶落月自修來桂
復香休向兵廚問消息且教下馬客先嘗之美有深
鎮兵廚未許嘗之句

李子搢約同上山督之

踏青時節醉何妨一掬歸心想見忙杖履不須從捷
徑觥籌且莫戀歡場明山秀水家家景野草閑花處
處香休訝登臨無腳力世閒險阻備曾嘗

答史正之

正之至連日清話恨不能文字飲也時

三月晦日

草堂深處百無妨卻為高岑對屬忙高適岑參杜暹

知對屬忙嘯鳥送春歸閬苑妖星亂世跼文場閑花

空怨綠衣使煮酒不隨青杏香見說麴生風味少尙

堪留與老饕餐嘗

陽城題北臺觀壁

幾年空負北山移今日方知見事遲猶憶王鳧初去
後忽驚丁鶴暫來時雖無壁上題名字頗愧棠陰聽
訟詩指似荒城舊游處西風搖落菊花期

客中寒食

斷蓬蹤跡寄天涯劍戟林中閱歲華又值禁煙焦舉
節焦亦柰無對月少陵家驚心咄咄催歸鳥觸目冥
冥濺淚花老後愁懷誰遣得未應端的酒勝茶

和徐子賢西行留別

便從傾蓋話詩情風雨端能落筆驚金馬謾誇三學

士碧油曾見一書生竹溪花圃留連醉水郭煙村取
次行自恨年來懷抱惡與君相別但吞聲

調祁定之

風埃滿面髮蓬垂欲學喬松久遠期浮世幾場漂杵
血流年一局爛柯碁不須玉女引巢父那在神官邀
退之果待吹噓送天上人間事了未為遲

姪謙甫鞏縣寄魚

掣三牽兩得沈腥顧我庖厨遠未能幾度敲針無處
釣一朝醒酒不須冰居官止合如羊續命駕何須學
季鷹當念家風本寒素莫從今後羨饑燈

母師聖醉中落水用郭進之韻

無人橋上醉婆娑腳力危時可奈何賀監未應真落
井屈平到底也隨波浮雲世事黃糧夢斜日秋風薤
露歌點檢交情能有幾柴門今後雀堪羅

下鰲背

浮雲蹤跡去留難谷謗巖嘲勒我還畢竟一身無著
處大都百計不如閑無多伎倆三休外是亦風流二
老閒昨日主人今日客回頭山色若為顏

許司諫歸來圖

社稷憂深志未舒陸渾山下賦閑居幾年不復朝鷄

夢一旦翻隨壠鶴書
朱游徒折檻寵踰疎
懸車商巖了卻和羹事方信旁求象不虛

寄伊陽令周文之括戶

幾年客裏厭馳驅故向伊川好處居剛受一廛同許
子誰知四壁過相如厥田不稱中中賦此事真堪咄
咄書疲俗脂膏今已盡看看鞭算及舟車

和子搢秋晚出郭

陶寫詩人得句忙舊游能復憶嵩陽山頭雲霽雨聲
歇水面風來花信香今日事雖非向日故鄉景自勝
他鄉杖藜念卻尋歸路獨立河橋詠晚涼

和述懷二

簪履三千氣壓齊寒林那羨一枝棲坐中有客鵬將
賦門外何人鳳欲題沽酒未嘗防惡犬著鞭寧復待
荒鷄夕陽休凭欄干望今日長安不在西
擬將齊物物難齊惟有山林跡可棲身望鳳池慙不
到名登鴈塔愧先題未能忘舊歸家鶴長是思鳴失
旦鷄天為東周道垂器肯生夫子在關西

戲嘲

江西社裏幾詩流詠月嘲風未肯休得句不能當競
病措辭那敢向春秋笑翻王氏三珠樹驚倒張家五

鳳樓帶繫雪詩三十韻勝如騎鶴上揚州

答子榮

行藏事拙且乘流游徧人間老卽休多汗愈膚三伏暑漸衰潘鬢一時秋風高勢欲欺茅屋雨急聲疑在竹樓今世宦情何處好但憂無蠲有監州

送史邦直入洛

肉山南去汗如流了取公家事便休征棹不霑瓜蔓水歸裝莫待菊花秋心中暫過平嵩閣別後頻登望省樓若問鶴鳴近消息翅翎飛不到揚州

卽事

鐵馬長驅汗血流眼前戈甲幾時休誰能宰似陳平社那免悲如宋玉秋漠漠微涼風裏殿蕭蕭殘夜水邊樓千村萬壑荒荆棘何止山東二百州

寬張文玘

怪來久不造龍門依舊相逢一笑溫任把錦囊嘲李賀休將布鼓詫王尊事隨勢過心猶駭言與時違舌可吞誰爲書生肯推轂綈袍且念故人恩

和竇君瑞

勒石燕山後世名憲子孫蟬蛻起風塵融誰憐喜鵲飛來意由自歎靈椿老大身禹鈞愁見灌夫杯酒過

嬰 夢驚蘇蕙錦書新 酒 幾年客裏無情話 一笑相逢 姓麥人

寶子温宅爲有力者所奪

謾勞買宅著千萬此又卜居何 從得把茅來頭可 蓋但教窗下膝能容尚憐相賀巢邊燕知爲誰甜花 底蜂速向元龍問閑舍暫將一榻過今冬

子榮途中見憶有先生在世人中龍三十年

前到月宮之句依韻謝答

高樓日日望元龍禾黍離離閔故宮兩地謾看千里 月五湖能借半帆風囊錐穎脫何難出名紙毛生未 肯通好在沁陽山色裏一厘寧許寄楊雄

弔曹慶之

杯酒中間氣沓拖從教千丈起風波絲棼世事無一 可花落人生得幾何休向棘林長夜哭試聽蒿里送 行歌豈容身後鍾君在阿鷺如今嫁者多

弔王德華

衰鬢愁添鏡裏絲流年恰及夢中著可憐白日佳城 地正值黃楊厄閏時 丁亥閏十一月 撫柩恨深元伯母負薪 情慘叔敖兒鬪體不識生前樂枉卻招魂費楚辭

贈醫郭顯道

小隱嵩陽種德時智能博物物皆歸籠中無愧狄仁傑山下常逢臺孝威子細論來生可養斬新卦得遯之肥麓疎誰似稻中散幽憤詩成憶採薇

焦彥昭失中子

相逢地下果何如自謂情鍾亦太愚未必珠能空老蚌豈期立不與童烏且憐商也無三罪尙喜徐卿有二雛萬事盡歸天子奪速宜收淚謝立夫

讀五代史

破卻千金築一臺折衝閫外望人才中原山嶽河分斷塞上牛羊草引來西海正驚天狗墮北人忽擁帝

春温軒

三尺枯桐膝上橫一彈洗盡綺羅塵芙蓉城裏誰爲主姑射山前別有人雲雨不侵行處夢丹青難寫醉時真早尋林下乘鸞侶莫遣春温過卻春

索和長平諸詩友送行韻信筆奉呈君玉閣

之資客中一笑 四

漢厦非無論道韞自慙老去鬢皤然閑愁似海藏皮裏往事如風過耳邊幾度班荆誰與話一朝傾蓋相憐柴門近日多來客火速移牀待孝先

青春人物正當時咫尺雲天快樂披相見便如膠漆
密此行還似箝弦離方傳細柳將軍令或賦甘棠召
伯詩待得一朝公事了聯鑣西去未爲遲

此身莫輒犯針氈只合浮沉委自然久墮風波人海
裏暫依雲漢使星邊斗升乞活真堪笑青紫歸耕亦
可憐早晚 皇家重名器著鞭當在祖生先

老覺龔疎過往時赤心今始爲君披交情大抵無新
舊人事從來有合離見說片辭能折獄未嘗一話不
言詩河東自古文明地可惜儒冠感遇遲

昨晚蒙降臨無以爲待早起院謝聞已長往

何行之速也因去人寄達少慰客中未

仲之志耳 二

縱橫入市盡裘氈一旦衣冠氣索然豈信魯連歸海
上頗哀屈子老江邊汗流石馬誰堪恨草沒銅駝世
所憐莫憚區區困刀筆論功終讓指蹤先

書生掉舌豈其時手底青編亦倦披鐵鎖尙沈江漠
漠銅駝又沒草離離陰山路上明如曲天寶年中杜
甫詩古往今來幾興廢白頭恨見太平遲

任仲山談西府事

德音到處下情通喜動山城百歲翁和氣挽回中國

化威聲振起外臺風少酬漢使澄清志不愧周官燮
理功南北封疆歸一統太平立法自河東

唐臣滿月洗兒索詩故賦 兩滿月

白頭休恨夢熊遲卻是人閒久遠期有客已為摩頂
記為君復草弄璋詩一從老蚌生珠後再值姮娥月
滿時咫尺昂霄看英物不須女子作門楣 有二女

留題新載之園亭

幽徑疎籬竹外村淡煙斜日水邊城地形占斗辨南
北風俗以人分重輕坐上有山圍似畫樽中得酒論
如兵青春將種多才調拂袖林泉恐不情 載之新于

送郡侯段正卿北行 二

征途萬里朔風寒過盡陰山復有山歲既在於辰已
後星多客向斗牛閒漫漫積雪無冬夏劫劫飛鴻自
往還若到龍庭試回首太行一片白雲閑

獵獵霜風墮指寒一鞭行色抵天山馬嘶衰草孤煙
外馬沒長空落照閒入塞盡穿氊帳過去鄉須待錦
衣還功名大抵黃梁夢薄有田園便好閑

送參謀劉君祥 二

寂歷書齋獨坐寒白頭羞見雪中山虛名得失蝸爭
外浮世榮枯蟻夢閒半夜朔風催客起幾時新月望

君還鶴鳴林下無人共何處煙霞不可閑
馬首風花拂面寒十年兩度過陰山浮雲暮暮朝朝
裏行鴈兄兄弟弟閒大抵故鄉生處樂莫教明主放
時還如今造物尤難料枉使身心不得閑

杜門

近來人事頗相乖獨坐何曾得好懷犬吠爲連沽酒
市鷄鳴長傍讀書齋門終待學張家塞闥恐難當噲
等排惡客就中多氣岸時時下馬繫堂堦

中秋二

露下天街一氣涼月明不復被雲妨正當金帝行秋
令疑是銀河洗夜光蛟室影寒珠有淚蟾宮風散桂
飄香席閒醉客忙歸去獨共三人盡此觴
共對青天好舉觴從前三五是尋常一年佳節秋將
半萬里清輝夜未央纔向缺時舒窈窕欲從盈後斂
光苾姮娥曾得長生藥我欲停杯問此方

和喬舜臣韻 六月十四日二

畫圖懸箇老人星一炷香煙禱處靈見說蟠桃將結
子不知槁木已忘形倚空山色青排闥掃地槐陰綠
滿庭凡骨恨無輕舉便且求強健保殘齡
幾年鬢髮已垂星豈是長生藥不靈席上精神歡伯

力塵中面目偶人形來歸徒訝荒陶徑學退還思過
鯉庭鄭重世情相愛甚一杯酒勸望延齡

郎子雲酒熟同李茂卿史正之豪取不許

愛錢措大眼孔小病酒先生舌本乾債是尋常誰不
有囊嫌羞澁且留看三人未必一人損豪氣難忘習
氣酸眊睨相逢欲空去從來如此四并難

再赴陽城用前韻別茂卿子雲正之

誰使腰間印欲懸不知面上唾纔乾先生敢以督郵
去坐客莫將官長看祖席又成攜手別離盃何苦上
眉酸且休凋落高陽社來往雙鳧也不難

代樂仲和張溫甫處督米

未必書生氣盡寒食常不足爲居閑清於儒子滄浪
水瘦以詩人飯顛山欲向田文彈鋏去恐因巨嫂頡
羹還聞君自有江湖量肯爲枯魚少破慳

清明席上同史正之姚君寶子昂

浮雲雨後自縱橫不待風收放曉晴百計花期成謾
與一年春色過清明誰家鑽燧罷藏火何處吹簫猶
賣餠回首故園魂欲斷鳥飛只是片時程

悼亾

須信人生足別離別離不待白頭時因憐曩日在縲

繼豈憚今朝炊屢屨中道奈何奔月去此情惟有落花知眼前活計無聊甚空對當年紙局碁

段侯行春顯聖觀喜雨

癸卯季春小旱清明後七日段侯正卿行縣回會名流勝士五十餘人於仙翁山下之顯聖觀須臾雨作自未至亥而止大滿人望酌酒相賀莫不盡酣適之興張種德有詩因和韻以紀其勝元帥申甫段玉使姚昇書於壁

行春冠蓋暫躊躇誰信東山面目疎興盡奚勞風送客氣和不覺雨隨車移民雖恨梁加少腐粟猶誇漢有餘獨嘆吾儒有何貴自今牛角莫橫書
傷儒人種田事

寄荅趙公定

他人共折依依柳居士但飲薄薄酒豈其必取齊之姜又恐不為白也母雖然客或許敦龐慙媿我無白壁雙更向稠桑老人卜準備買紅纏酒缸

姚子昂壽日

二月初三日
門外風光二月初衣冠把酒慶懸弧一生接物無腸蟹萬事隨緣短脛鳧坐上書空窺草聖醉中疥壁笑詩奴年來世事俱嘗遍只合千金養客軀

又用濟之韻贈子昂

綿綿宗派自何時借問吳興第幾支書愛換驚功不到獄因劾鼠法先知為秦徒木思無地在漢高門福有基此去鄉間結仁愛請君聽取忍齋詩

有仁人已結鄉間愛之句

為劉益之營中上王懷州

自分毛錐不入時如今尤恨埽門遲徒勞魏氏貪鷄肋卻笑虞人望幾皮未有赤心相待處柰何白髮是歸期儻令扶病還桑梓橫草難忘報所知

羶帳連雲逐日移胡笳月底不勝悲中原為患有驕

子造物戲人如小兒馮鈇縱彈無便去晏參未解首

誰知天涯回首消魂處故國霜前鴈過時

錦堂碧落壽席

年五十一

年光過隙一何忙知命年來百念忘公事了時陰德大塵緣斷後道心涼未償勇退求閑志先得長生不老方共勸十分添壽酒莫辭醅酹醉山堂

答張文玘見戲

邂逅騷人興愈多不知賜也許同科君猶老去詩魔在我柰新來技癢何但幸近無阿買寫憑誰付與雪兒歌一從探得驪珠後驚倒中洲蚌與蠡

和王季文襄陽變後

二

逐鹿中原未識真指蹤元自有謀臣虞全不念唇亡
國楚恐難當舌在人拔劍挽回牛斗氣舉鞭蹙起漢
江塵相逢空灑英雄淚誰是荊州一角麟

天命須分偽與真衙蜂戰蟻盡君臣蛟龍不是池中
物燕雀休嗤壠上人衣不能勝嵇紹血扇無可柰庾
公塵自從絕筆春秋後誰復傷時為泣麟

僧奴

劉氏甥十一月二十一日生籌堂子

白髮因緣短犢車可憐小德外家無蚌生珠後何嫌
老鳳有毛時亦自殊會看伯仁興絡秀不妨節信論
晉夫劉生誰謂難成事將相從來有種乎

注劉牢之甥酷似其舅共舉大事誰謂無成

喜事相尋種種來豈期天意一朝回璋從弄後熊無
夢月到圓時蚌有胎便可字教阿買識那消錢為窟
郎堆賢愚懷抱俱休挂且盡前尊露頂杯

和楊之美韻

趙

光華異域仗全才銜命怱怱出吹臺物外英標傾水
鏡坐中妙語落瓊瑰節回北闕旋如斗名振西陲聽
若雷不踏賀蘭山下石國風未合入詩來

和李唐傑韻

二

翰墨場中第一人而今委翅在鷄羣縱橫詩律凌徐

庾浩汗詞源媿典墳
兵氣橫流存此老天心
未欲器斯文年來草就歸田賦
嘯傲南山臥白雲

郵筒寄後憶詩人
落落英才迥出羣
試問槐花忙幾舉可憐桂子落誰墳
浮沈且與陪中立
喜愠何嘗見子文
傾破葵心望天表
龍庭不日會風雲

大朝再試

悼籌堂

霞鞍金轡紫絲條
玉帶紅靴織翠袍
赳赳少年真手臂
津津玉氣見眉毫
不愁造化功難補
可惜秋山勢自高
那免牛車身後患
一場春夢亦徒勞

和秦克容來韻

白頭羞入利名場
得得歸來自遠方
何日詩豪離上黨
去年道話憶山陽
可憐杜宇訴亾國
還笑沐猴思故鄉
不意閑中春色早
黃鸝嘯破謝家莊

癸酉榜後寄姪謹甫

第一科

萬軸牙籤未是多
十年辛苦短檠歌
敢忘奕世箕裘業
忽玷清朝甲乙科
我已夢君三舉後
君如輸我一籌何
二疎此去人方識
名字先應報大羅

塵忝後夢一人云
王道衡李撫更三舉
二人亦高第
癸酉省試王道衡第二
御試撫第二
道衡第十
一隅三舉也
本壬申舉場為兵事移至次年

和安齋見寄調祁定之

麻衣補破紙爲條不羨仙人宮錦袍
天地老於雙轉轂山河渺似一秋毫
煉深寶鼎丹砂就瑩徹靈臺夜
月高上界而今官府足暫游塵世莫辭勞

莊靖先生遺集卷之二終

